

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- उत्तरी कमान प्रमुख अध्यक्ष होरें मुखमंत्रि होरेंगी मिलियै उनेंगी नियंत्रण रेखा कन्ने लगदे इलाकें दे ताजा हालात बारै ब्यौरा दित्ता।
- उपमुखमंत्रि होरें राजौरी दे बन्ने कन्ने लगदे इलाकें दा दौरा कीता, लोकें गी सुरक्षा प्रबंधें गी निगगर बनाने दा भरोसा दोआंदे होई आखेआ जे लोकें दी सलामती ते सुरक्षा सरकार दी पैहली तरजीह।
- मुख्य भरै च तिरंगा जातरा दा जोश दिक्खने गी लब्बा'रदा ऐ। जम्मू च एह जातरा अज्ज कइडी जाग।
- जम्मू प्रांतै च बन्ने कन्ने लगदे जिलें च अज्ज किश जोनें च स्कूल खोली दित्ते गेन।
- भारत ते पाकिस्तान बश्कार संघर्ष विराम दे बाद श्री माता वैष्णो देवी जी दी जातरा च बल्ले-बल्ले बाद्दा होआ'रदा ऐ। श्राइन बोर्ड नै हेलीकाप्टर सेवा ब्हाल कीती, कोई होर सुविधाएं दी बी घोषणा।

<><><><><><>

CM-Army Commander

उत्तरी कमान प्रमुख लेफ्टिनेंट जनरल प्रतीक शर्मा होरें मुखमंत्रि उमर अब्दुल्ला हुंदे कन्ने मलाटी कीती ते उनेंगी मौजूदा सुरक्षा स्थिति बारै अवगत करोआया।

उनें जम्मू-कश्मीर दे बन्ने आहले ते कब्जा रेखा कन्ने लगदे इलाकें च होई दी हाल दी गतिविधिएं बारें बी जानकारी उपलब्ध करोआई। इस मौके पर 15 कोर दे जीओसी लेफ्टिनेंट जनरल प्रशांत श्रीवास्तव होर बी उन्दे कन्ने मौजूद हे। मुखमंत्री उमर अब्दुल्ला होरें आखेआ जे साहड़े सुरक्षाबल बेहतर तरीके कन्ने मुखै दी राखी हिफाजत करा'रदे न।

<><><><><><>

Dy.CM Nowshera

उप-मुखमंत्री सुरेंद्र चौधरी होरें राजौरी जिले दे सब डिविजन नौशहरा दे बन्ने आहले इलाकें दा दौरा लाया ते बन्ने पारा सोयां हाल च होई दी गोलीबारी मगरा हालात दा जायजा लैता। अपने दौरे दौरान उप मुखमंत्री होरें उने घरें दा जायजा लैता जिनेंगी गोलीबारी करी नुकसान पुज्जा ऐ। उनें प्रभावित परोआरें कन्ने मलाटी कीती ते लोकें कन्ने गल्लबात कीती। उपमुखमंत्री होरें लोकें गी भरोसा दोआया जे मुश्कल ते जरूरत दे इस बेल्ले सरकार उन्दे कन्ने ऐ। उनें आखेआ जे कब्जा रेखा कन्ने लगदे इलाकें कश रौहने आहले लोकें दी सुरक्षा सरकार दी पैहली प्राथमिकता ऐ। उनें आखेआ जे लोकें दी सुरक्षा लेई होर व्यक्तिगत ते समुदायिक बंकर बनाए जाड़न।

<><><><><><>

Tiranga-Yatra

भारतीय फौज दे आप्रेशन सिंदूर दी ऐतिहासिक जित नै समूलचे मुखै गी आत्म सम्मान ते गौ दी भावना कन्ने भरी दिते दा ऐ ते हर कोई अपने सैनिकें दी हिम्मत, दलेरी ते राष्ट्र दी रक्षा लेई उंदी समर्पण भावना दा गुणागान करा करदा ऐ।

इस्सै कामयाबी गी इक जश्न दे रूपै च मनाने लेई मुख भरै च 11एं दिनें दिएं तिरंगा जातराएं दा सरिस्ता कीता गेआ ऐ जेदे च शामिल समाज दे बक्ख-बक्ख तबकें दे लोक भारत माता दी जय ते भारतीय थेआरबंद बलें दी जय-जयकार करदे होई चबकिख्य देश प्यार ते राश्ट्रीय इकजुटता दा नजारा पेश करा करदे न।

आकाशवाणी दे जम्मू संवाददाता नै जानकारी दिती ऐ जे जम्मू च तिरंगा जातरा अज्ज कड़ी जा'रदी ऐ। जम्मू-कश्मीर बीजेपी दे संगठन महासचिव अशोक कौल होरें जम्मू दे लोकें अगगे अपील कीती ऐ जे ओह इस जातरा च शरीक होने लेई अज्ज संझा 5 बजे जम्मू दे इंदिरा चौक च कट्ठे होन। एह जातरा इंदिरा चौक थमां लेइयै विक्रम चौक तोड़ी कड़ी जाग जेदे च समाज दे बक्ख-बक्ख वर्गें दे लोकें दे बधी चढ़ियै हिस्सा लैने दी मेद ऐ।

<><><><><><>

CS

मुख्य सचिव अटल डुल्लू होरें अखनूर ते खौड़ दा दौरा लाया ते बन्ने पारा थमां होई दी गोलीबारी मगरा दे हालात दा जायजा लैता। इस मौके पर जम्मू दे डिविजनल कमिशनर रमेश कुमार ते डी.सी जम्मू सचिन कुमार वैश्य होर बी मौजूद हे। मुख्य सचिव होरें मुकामी हायर सेकेंडरी स्कूल सोहल ते भलवाल ब्राह्मणा दा जायजा लैता। इनेंगी आरजी तौरा पर उनें लोकें लेई आसरमा बनाया गेआ ऐ जेड़े बन्ने पारा थवां होने आहली गोलीबारी करी प्रभावित होए। उनें प्रभावित परौआरें कन्नै गल्ल कीती ते इंतजामें दा जायजा लैता।

<><><><><><>

DC-Udh

उधमपुर दियां डिप्टी कमिशनर सलोनी राय होरें पंचैरी मोंगरी च चला'रदी बक्ख-बक्ख शिड़क परियोजनाएं दा जायजा लैता। उनें जिले च खाली पेदे सरकारी क्वाटरें दी बी जानकारी हासल कीती। शिड़कें दी प्रगति दा जायजा लेंदे होई डिप्टी कमिशनर होरें मुतलका अफसरें गी हिदायत दिती जे ओह तय नियम कायदे मूजब गै कम्म करन ते चला रदे प्रोजैक्टें गी समेंसिर सबूरा करन। होर जानकारी स्हाड़े उधमपुर संवाददाता थमां।

<><><><><><>

School-Reopen

स्कूली शिक्षा निदेशालय जम्मू नै जम्मू प्रांतै दे बन्ने कन्ने लगदे 5 जिलें च किश होर स्कूलें गी अज्जै थमां खोलने दा नमां हुक्म जारी कीता ऐ। आकाशवाणी दे जम्मू संवाददाता नै जानकारी दिती ऐ जे जम्मू जिले दे अरनिया, बिश्नाह, आरएसपुरा, मीरां साहिब, मढ़, अखनूर, ज्योड़ियां ते खौड़ जोन हेठ पोंदे स्कूल अजें बंद रौहडन जिसले जे चौकी चौरा, भलवाल, इंसांल, गांधीनगर, जम्मू सिटी ते परमंडल जोन हेठ पोंदे स्कूल अज्जै थमां खोली दिते गेन। स्कूल खुल्लने पर बच्चें च बड़ा मता उत्साह दिक्खने गी लब्बा करदा ऐ।

तोआई, साम्बा जिले च रामगढ़, साम्बा ते घगवाल जोनें हेठ पोंदे स्कूल बंद न जिसले जे परमंडल ते विजयपुर जोन दे स्कूल अज्जै थमां खुल्ली गेन। कठुआ जिले च जिनें जोनें हेठ पोंदे स्कूल अजे बी बंद न, उन्दे च मढ़ीन ते हीरानगर जोन शामिल न जिसले जे बरनोटी, लखनपुर, सल्लन, घगवाल ते कठुआ जोन दे स्कूल अज्ज आम ध्याड़े आहला लेखा खुल्ले देन।

इस्सै चाल्ली राजौरी जिले च मंजाकोट, डूंगी, नौशहरा, दंदेसर, सुंदरबनी, राजौरी ते बलजरालां जोन दे स्कूल अँ बंद न जिसले जे पीरी, कालाकोट, थन्नामंडी, मघोला, खवासलोअर हत्थले, कोटरंका ते दरहाल च स्कूल खोलने दा हुक्म जारी कीता गेआ ऐ। पुंछ जिले च मनकोट, मेंढर, बालाकोट, हरनी, नंगाली, मंडी, कनुइया, सथरा ते पुंछ जोनेँ हेठ पोंदे स्कूल अजें बी बंद न पर सुरनकोट ते बफलियाज जोनेँ हेठ पोंदे सब्बै स्कूल अज्जै थमां खोली दित्ते गेन। एह हुक्म सब्भनेँ सरकारी ते मानता हासल प्राइवेट स्कूलें पर बी लागू ऐ।

<><><><><><>

SMVD-Yatra

भारत ते पाकिस्तान बश्कार तनाव घट्ट होने मगरा श्री माता वैष्णो देवी जी दी जातरा लेई औने आहले श्रद्धालुएं दी गिनतरी च बल्ले-बल्ले बाद्दा दर्ज कीता जा'रदा ऐ। आकाशवाणी जम्मू संवाददाता दी रिपोर्ट मूजब हून समें कन्नै विश्व प्रसिद्ध इस श्राइन च श्रद्धालुएं दी गिनतरी परतिए बदा'रदी ऐ। श्री माता वैष्णो देवी श्राइन बोर्ड नै श्रद्धालुएं दी सुविधा लेई केई सारे उपाऽ कीते देन। श्राइन बोर्ड आसेआ श्रद्धालुएं लेई मुफ्त आरती दर्शन ते रौहने-बौहने दी सुविधा दिती जा रदी ऐ। जातरा लेई हेलीकाप्टर सेवा बहाल करी दिती गेई ऐ ते सुरक्षा दे बी निग्गर बंदोबस्त कीते गेन।

<><><><><><>

DC-Kishtwar

किश्तवाड़ दे जिला विकास कमिशनर राजेश कुमार शवन होरें लोकेँ तगर पुज्जियै उंदिएं दिक्कतें-शकैतें गी सुनने लेई ब्लाक पलमा च इक जनता दरबार लोआया।

इस दौरान डी.सी. होरें लोकें कन्नै गल्लबात कीती ते उंदिएं विकास जरूरतें बारै जानकारी हासल कीती। लोकें खुल्लियै उंदे अग्गे अपनियां मंगा रक्खियां जिंदे च सेहत सुविधा, शिक्षा, शड़क राबता ते ढांचागत विकास सरबंधी मुद्दे शामिल हे। इस मौके बोलदे होई जिला विकास कमिशनर होरें आखेआ।

<><><><><><>

NCSC-Training

अनुसूचित जातिएं ते जनजातिएं लेई राश्ट्रीय करिअर सेवा केंद्र जम्मू, जेड़ा जे भारत सरकार दे श्रम ते रोजगार मंत्रालय दे रोजगार सरबंधी महानिदेशक दे मतैहत इक दुतर ऐ, ओह जम्मू-कश्मीर ते लद्दाख च अनुसूचित जातिएं ते अनुसूचित जनजातिएं दे बच्चें गी मुफ्त सिखलाई देने जा'रदा ऐ जिस दौरान उनेंगी स्टार्पेंड बी दिता जाग। एह सिखलाई उनें नौजवानें गी दिती जाग जेड़े अपने अंदर कोई हुनर पैदा करियै कम्म-रोजगार हासल करने दे लायक बनना चाहंदे न। योग्य नौजवानें गी नीलिट ते विशेष कोचिंग स्कीम तैहत इक बरे लेई ओ लेवल कम्प्यूटर साफ्टवेयर ते ओ लैवर कम्प्यूटर हार्डवेयर ते मेनटेनेंस दा सिखलाई कोर्स कराया जाग। सिखलाई हासल करने दी इच्छेआ रखने आहले नौजवान जम्मू दे तोप शेरखानियां, शांति नगर स्थित रोजगार निदेशालय दी ईमारत दी चौथी मंजल च एससी, एस.टी लेई राश्ट्रीय करिअर सेवा केंद्र च कम्मकाज आहले कुसै बी ध्याड़े जाइयै संपर्क करी सकदे न।

<><><><><><>